



Ralph Midgley,  
24 Stanwell Rise,  
SCUNTHORPE,  
DN17 1TF  
U.K.

YELOD TELDEGFOLID

NÜM 10

TOBUL 2014

(Pads 73 jü 80)

O Volapükaflens valöpo!

Binos veratik ad sagön, das pük binon nämäd. Dist vü mens e nims binon sästantiko pük, bi medü pük mens kanons spikön odes, e nunön odes alsotikosi. Votaflano nims no dalabons skili at jü nivod lölöfik menas. Klüliko nims dalabons soti püka balugik, me kel kanons nunön odes dinis staböfik, aldelik, balugik, ab fümiko no äs lä mens. Mens eprogedons sekü pük, bi dubo äkanons kompenön ko tikamagots nulik timakompenanas.

Püks netas gretik binons äs vafs, kels flunons netis votik. Noe binons üfo püks kösömik, abi volapüks. Volapük adelik binon Linglänapük; ab volapük tumyela degjölid äbinon Frans-änapük. Kim sevon-li, kis obinon-la volapük fütürik? Net alseimik pleidonöv ad vedön pük atsotik, bi kanonöv dubo flunön kulivi vola lölik. Soäsä nets vönik, kanonöv progedükön noli ai nuliki e veütiki, e pato noli kaenavik attimik.

Ab nets smalikum neföro äplidons jenöfoti somik. Cedü ons, nets gretik noe äplöpons mödikumo fineno, abi nu vilons, das nets valöpo i spikons püki netik onas. El Schleyer gudiko äsuemom säkädi at, ed ämotom tikamagoti frutik. Cedü om, if dabinonöv püki mekavik, ko vödem neudik, keli alan mutonöv lärnön, pük netik seimik no plu labonöv buädi gretikum ka nets votik su tal.

Valikosi gudikün oles ed olikanes

sedom

*Ralph*

LÄLID IN STUNALÄN

(fa Lewis Carroll)

KAPIT DEGTELID (DIL BALID)

TEMUNOD ELA LÄLID

"Ekö ob!" ävokädoſ Lälid, glömöl pö kofud timüla et, das iglofof gretikumo dü minuts anik pasetik, ed äbunof sui futs so spidiko, das ägüflekoſ yulanöpi me sim juüpa okik; yulans valik äfalons sui kaps menamödota dono, ed ekö! ons, kels fino äseatons su glun. Atos ämebon ofe levemo gefi goldafitas, keli fädo isturoſ bü vig bal.

"Ag! Säkusadolsös obi, begö!" ävokädoſ bluviko, ed äprimof ad vifiküno lasumön onis, bi meib gefa fulü goldafits no ilüvon ofi, ed ätikof lufümiko, das ödeadons if no pöpladons omis dönu ini yulanöpi.

"No kanoy fovön me cödäd jüs yulans *valik* obinons in yulanöp," äsagom fefiko Körareg - "valiks," ädönuom ed älogedom seväriko lü Lälid, du äspikom.

Lälid logedof lü yulanöp ed eküpedof, das sekü spid ofik, iseitof Lasäri usio me kap dono, e nimil pöfik älemufükom göbi omik glumaladäliko, bi no äkanom mufön. Suno äsetirädoſ oni dönu, ed igüükof omi; "Ab atos lölöfiko no lindifos," äsagof oke: "Cedü ob, el Bill olabom völadi leigik pö cödäd, va güik, va negüik."

Sosus yulanef boso igetakedikon, e sletots e stafüls dönu pituvons e pilovegivons ones, äprimons ziliko ad penön nunodi tefü mijenot, pläämü Lasär, kel äkanom dunön nosi sekü jekot, keli ibelifon, e te äseadom logetölo lü nufed cödöpa ko mud maifik.

## X:75:2014

"Leveriko nosi-li?" äläidulom Körareg.

"Leveriko nosi," äsagof Lälid.

"Atos binon go veütik," äsagom Körareg, flekōlo oki lū yulanef. Iprimons ad penetōn atosi su sletots okas, ven Krolig Vietik äropom: "*Neveütik, o Mayed Orik, klüliko vilor sagōn,*" äsagom Körarege mu stimo, fronükōlo flomi ko jäst dodik.

"*Neveütik, klüliko ävilob sagōn,*" vifiko äsagom Körareg, ed äspikom lū ok it lafalaodiko: "veütik ... neveütik ... neveütik ... veütik", äsif ävilom dunōn sperimānti ad tuvōn vōdi, kel labon tonodi gudikūn.

Yulans anik äpenons: "veütik"; votikans: "neveütik". Lälid äkanof logōn atosi, bi änilof saidiko ad lovelogōn sletotis onas; "ab lölōfiko lindifos," ätikof.

Tū timül at, Körareg, ipenōlo dū timil anik jäfädiko ini penetabuk oka, ävokādom: "Seilö!" ed äreidom laodiko se bukil: "*Nom: foldegtel: Pösods valik labü geilot liöla plu bal mutons luvōn cödöpi.*"

Alikans älogedons lū Lälid.

"Ob no labob geiloti liöla bal," äsagof Lälid.

"Ga si!" äsagom Körareg.

"Geiloti ti liölas tel," äläükof Köradaim.

"Löliko refudob ad mogolōn," äsagof Lälid. "Alo nom et no nomon - edatuvol oni ol it ebo anu."

"Binon nom bäldikūn in buk," äsagom Körareg.

*Fövoti konota kanoy reidōn su pads gaseda ün mul okömöl*

## X:76:2014

### VIPAFONÄD (DIL BALID)

fa hiel Frank Roger

Äbinon-li top kuratik? Iglobob-li ba züi gul pölik?

Äziloglob. Ästeifülob ad түvön, kiöpo äbinob.

No, igidetob. Ekö! dido piad: 'Heybourne' me bims e domakeds pezüöl, kelis ämemob. At ämuton binön top, kö ibinob tü zädel pasetik. Ämemob lekleiliko kolkömi fädik ko flen büik oba nemü 'Nick', keli no ilglob sis lunüp. Ivüdom obi ad golön ini 'Vipafonäd': bötädöp len gul süta, kö äbinom dunetäb laidik, ad juitön drinodi.

Ifölob vüdi oma ko blesir, ed ilifädobs timi legudik kobo, luspikölo dö dels vönädik legudik e drinölo biris anik kalieta legudik. Ilüvobs odi promü kontags fütürik. Liedo iperob diledi papüra, su kel ipenetob ladeti oma.

Bi fino ilükömob dönu ini niläd at pötü bal spatas obik kösömiik tü poszedel zädelik da zif, tikamagot ikömon obe ad vestigön, va el 'Nick' äkomom ba anu in biribötädöp pebuüköl oma.

Logot bukiselidöpa lölöfiko no äbinon lenulik. Klülab-iko ädabinon ya sis tim anik klülädü vor ota e smel patedik bukas neflifedik püfik su bukaboeds, kels äblegikons kodü vet otas. Valikos äbinon bisarik, jenöfo äbinon lölöfiko neplänovik.

Meditölo dö müster, äglobob ini bukiselidöp ed älükömob fino lü räyun lekoneda-literat. Äkanob bo түvön us bukis nitedik. Ad blesir gretik oba, ätuvob lekonedis tel gölik fa el José Saramago, buks pato plitik obe, kels no nog ädabinons in konlet oba. Ireidob yegedi dö lautan ebo ün göd et, meb pötik obe ad remön bukis mödikum fa om. Din bisarik kion ad түvön fädo onis is!

Äsumob onis de bukaboed, äreidob tanädavödemi, ed ädalogob suämis. Do buks ibinons ya pegeböls, kaliet otas äbinon gudik. Äglobob lü pelöp, äpelob onis, ed ägeglob lomio.

## X:77:2014

No plu ätikob dö flen oba: ‘Nick’ e biribötädöp oma müsteriko inepuböl. Töbo äkanob stebedön ad primön reidi bukas.

Tü vigafin sököl ädesinob ad visitön dönu eli ‘Pehuköl fa buks’, bi ävilob vestigön kälöfikumo lofoti ona. Ven ilükömob lü piad, äsoafob vemo, ed äledesirob ad drinön u kafi u biri. Äsludob ad remön drinodi in biragad, büä äföbob vestigami buköpa.

Büä äseidob obi, älülogob vifiko lü gul piada, e lölöfiko no äkanob kredön logis obik. El ‘Pehuköl fa buks’ no plu äbinon us, ed ekö! plao el ‘Vipafonäd’! Dū timüls anik älai-logedob usio nenkredölo, täno ägolob nevifiko lüodü biribötädöp. Ämutob gevon obe fūmi dö verat atosa.

Tikäl oba, äcūton-li obi? Älienetikob-li? Äbinob-li viktīm disina legretik? Dun cogana levalik-li? Ädrimob-li ed ögalikob-la suno dönu in vol jenöfik?

Ägolob desino ini biribötädöp, spetölo, das övedon-la bukiseliidöp onu. Ye äblebon kuratiko ma mem oba dö visit balid bū vigs tel.

Vög sevädik ätroivon stadi drimik oba:

“Glidis, o Konrad! Blesir kion ad kolkömön oli. Äsevo, das ögekömol tū del seimik.”

Ekö! flen oba Nick, smililölo, kel ätovom vāri bira dagik ad glidön obi. Nendoto ikūpom lestuni nekredöl oba, bi äsäkom:

“Kis ejenon-li, o Konrad! Logodanotod ola binon stunik.”

Ägolob lū om, ed äpladob nami su jot omik äsvo ad gevön obe fūmi, das äkomom jenöfo is.

“Bisarikos jenon, o Nick! Bū vigs tel äbinob is ko ol. Täno, dū vig pasetik älükömob isio, e biribötäd äbinon mo. Su top at äbinon bukiseliidöp. Ed anu, ekö! biribötädöp dönu. No kanob suemön osi.”

Fövoti konota at kanols reidön su pads gaseda mula okömöl

**MENOD BALID VOLAPÜKA (VÜ YELS: 1887 E 1889)**

**Diläd balid: votükams fa kongred telid (1887)**

Volapükakongred bevünetik telid äjenükon in ‘München’: zif Deutänik < ün yel: balmil jöltumjöldegvel. Jenot at äbinon vemo veütik pro Volapük, sevabo: e pro Volapükamuf, e pro pükasit Volapükik. Balido, tefü Volapükamuf: äfunoy fedi valemik Volapükik e kadämi Volapüka. Hiel ‘Schleyer’: datuvan Volapüka < ävedom cifal balid. Telido, tefü pükasit: dü kobikam at ädunoy balidnaedo menodi calöfik Volapüka. Vilob penön dö votükams fa Volapükakongred telid, penön, vio Volapük rigikün ävedon Volapük rigik.

***1. Votükams penama, lafaba, foneta e lotografa***

1. Bü yel balmil jöltumjöldegvelid iğeboy in buks Volapükik tonatis patik nen vokätamals ad malön vokätis. Tonats et ibinons tonats latinik tefik sa nedeto lenyüm liena bobik. Tonats at pubons dono (magods se map “Volapük Capital Umlauts” penemöl grupa Volapükik ela ‘Yahoo!’):

Mayuds			Minuds		
<i>Ḃ</i>	<i>Ḅ</i>	<i>Ḇ</i>	<i>Ḃ</i>	<i>Ḅ</i>	<i>Ḇ</i>
Ä	Ö	Ü	ä	ö	ü

Sis yel: 1887 tonats patik at pämoükons e päpladulons me sümbols tefik lafabas Yuropapükik (as sam, Deutänapükik), sevabo: me vokats sa vokätamals.

2. Primo idabinons in Volapük palatatonats (e palatatons) tel sümik, sevabo: el ‘h’ (Deutänapüko: “ch”, Rusänapüko: “x”, Sperantapüko: “ĥ” ü “hh”) ed el ‘ ’ (Deutänapüko e Sperantapüko: “h”). Tonat lätik panemon ‘dasia’ e malon haugi vemik (eli ‘spiritus asper’) in lafab Grikänapükik. (Cedob, das mögos ad penön eli ‘dasia’ as güflekik liunül löpiköl.) Iğeboy mayudis pos el ‘dasia’ in lönanems, as sam: **‘Indostän, Ieronümus**. Ämoükoy eli ‘dasia’ e äpladuloy oti me tonat ‘h’, as sam: vöd: **‘üm** (ma lotograf rigikün) ävedon **hüm**. So lafab Volapüka rigik ninädon tonatis teldegvel pla teldegjöl Volapüka rigikün. (Vü kläms noetob, das te tonat ‘dasia’ pägebon in vödabuks Volapükik lölöfik pro Rusänapükans, kels päpübons ün yels: 1886 e 1887, soäsä in dabükot kilid vödabuka fa hiel ‘Schleyer’.)

3. Tonat vönädik “h” päpladulon me “q” in lafab fonetik. Tonats at äjonidons ad penön rigafomi fonetik lönanemas, ü pronimagi, as sam: **Kirchheimbolanden → Kirqeimboländen**.

## X:79:2014

4. Tonat **h** stamādas Volapükik ävedon el **k u x** sa cein tefik prona, as sam: **hem** → **kiem(av)**, **heresavin** → **xere(sa)vin** (Deutānapüko: *Xereswein*).

5. Jü yel: 1887 lönanems pipenons Volapüko telsotiko. Balido, ipenoy nemis dub lafab fonetik, e poso idaloy penön onis ma lotograf licinik vü kläms. Telido, hiel ‘Schleyer’ igivom vödes anik fomis patik Volapükik in vödabuks omik, as sam: **Filip** (Linglānapüko: ‘Philip’), **Aglaya** (Linglānapüko: ‘Aglaiā’), **Amsterdam** (Linglānapüko: ‘Amsterdam’), **Amazonaleflum** (flumed ‘Amazon’), **Elüsium** (Deutānapüko: ‘Elysium’, parad), **Gios** (‘Chios’: nisul Grikānik), **Kadalkivir** (‘Guadalquivir’: flumed Spanyolik). Logolsös as sam traduti dispenāda se pened anik: *Hochachtungsvoll A. K. Zellendorf* → *Lestimik Zélendorf A. K.* (Kniele, R. Tedaspod deuto-volapükik. – Überlīnen I. B.: Bük fa Feyel August, 1885. – Pad: 26).

Äsludoy ad penön lönanemis ma lotograf licinik ed, üf zesüdo, id ad penön poso proni nemas ot me lotograf fonetik vü kläms, as sam: **München** (**Münqen**).

6. Primo yümamalül iteilon noe vödilis: **-li**, **-la**, abi yümotis genik: **ji**, **om**, **os** < e bidirafinotis: **-ös**, **-öd**, **\*-öz**, **-öv**. Samo: **ji-matel**, **om-dog**, **gudik-os**. Äsludoy ad gebön yümamalüli te pö vödils ed ad penön yümotis nen yümamalül, as sam: **ji-tidel** (bü yel: 1887) → **jítidel** (pos kongred telid).

### **2. Votükams vödidefomama**

7. Äsludoy ad finidön foyümoti vomik “of-”. Te el “ji-” äblibon de foyümots vomik tel Vöna-Volapüka. Bepikob säkädi gramatagena fulikumo.

Noms tefü pösods. Vöds patik ad sinifön vomis ädabinons ai, as sam: **vom**, **mot**, **läd**. Jü kongred telid nenyümotiks vöds cali pinemöls ibinons manik, samo: el **tidel** isinifon **hitidan**. De vöds manik at vöds vomik pifomons dub lenyüm yümota bal telas, sevabo: **ji-** ud **of-**. Foyümot “ji-” imalon vomi ma cal himatana ofik ed el “of-” imalon vomi ma cal ofik, samo: **ji-tidel** (nuiko: “jimatān tidāna”), **of-tidel** (nuiko: “jitidan”). Cedob, das pär vödas vönädik at binon mu nitedik: **ji-gam** (nuiko: “jigam”, jimatān fütürük), **of-gam** (nuiko: “jikleudan”, kel binof metaforo jigam ma cal ofik, efe jigam Kristusa). Ma slud kongreda foyümot “of-” pämoükon, e te foyümot vomik “ji-” äblibon, kel äprimon ad malön vomi as calan, samo: vöd vönädik “of-tidel” ävedon “jítidel”. Ün yel: 1887 äprimoy ad nemön vomi ma cal himatana ofik dub geb vödagrupas, as sam: **vom tidela** (tradut vödik stukota Fransānapükik), **jimatel tidela** (kanols küpetön, das ägeboy poyümoti pösodik “-el” suvikumo ka eli “-an” in Volapük rigik).

Noms tefü nims. Vöds patik ad sinifön jinimi ädabinons, soäs nu in Volapük, samo: **kun**. Vöd nimi äsiniföl nen yümot genik änemon nimi as

dil bida onik, nendas ämalon geni. Ad malön geni nima, ägeboy yümotis sököl: **om-** (manik), **ji-** (vomik), **of-** (vomik; te jü kongred telid). Samo: **omdog** (nuiko: hidog), **jidog**. In Volapük rigikün no ikanoy distidön siämis vödas siämaröletik vomik, soäs vöds sököl: **ji-dog** e **of-dog**.

Noet. Hiel ‘Schleyer’ idälom ad gebön elis “ji”, “of”, “om”, “os” ed as foyümits, ed as poyümits, as sam: vöds **os-gudik**, **gudikos** ibinons siämaröletiks. Kösoömo els “ji”, “of”, “om” ye äjäfidons as foyümits, ed el “os” – as poyümit, in vödems Volapükik sis prim geba mekavapüka at.

Ye in tidabuk Rusänapükik, ün yel: balmil jöltumjöldegzül päpüböl, foyümit “of-” pägivon as yümit teik vomik calöfik, kel pizepon fa kadäm, samo: **oftidel**, **ofblod**, **ofpul** (tidabuk fa jiels ‘Enderneyt’ e ‘Korovina’. – St. Petersburg, 1889. – Pad: 28). Klülos, das kadäm, kel itaspikon hiele ‘Schleyer’, ivälon (u geükon) foyümiti “of-”.

8. Ladvärbis defomamik pidilädons ad grups tel: 1-ido) uts, kels pidefomons de subsats (me “-o” ifiniköls), e 2-ido) uts, kels pidefomons de ladyeks (me “-iko” ifiniköls). Dü kongred telid äsludoy, das no ödaloy gebön ladvärbis grupa balid, jüs kadäm übetikon säkädi at. Ye Volapükans äfövens ad gebön ladvärbis grupas bofik, samo: **stepo**, **penedo** (Spielmann, S. Volapük-Almanach für 1888. – Pad: 65).

### ***3. Votükams fomira e vödstoka***

9. Ven Volapük idavedon, Volapüko fom plütik pönopa pösodik voik gramatapösoda telid idabinon, sevabo: “ons” (do el “on”) ibinon pönop nefümik, soäs vöd nuik: “oy”). Äsludoy ad finidön fomi plütik pönopa at id ad gebön ai vödi (e poyümiti värbik tefik) “ol” pö spikam pösode bal ed ad gebön ai vödi “ols” pö spikam pösodes plu ka bal.

Hiel ‘Schleyer’ ye äfövom ad komandön gebi foma plütik löpo pemäniotöla.

10. Ladyek natapükas difik pitraduton suvo me ladvärb Volapükik. Atos ibinon fikulik pro Yuropans mödik. Kodü atos äsludoy ad distidön stüls tel, sevabo: stül balugik e stül sevärik. Ädaloy gebön ladyek pla ladvärb, kel notodon malodi e papladon pos värb, as sam: **golön vifiko** (stül sevärik, fom dälovik) = **golön vifik** (stül balugik, fom mögik). Nitedikos, das hiel ‘Schleyer’ it ägivon suvo ladyeke Volapükik nedotik ladvärbi as tradut, samo: **pemik** = *durcheinander, kauderwelsch* (dabükot kilid vödabuka Volapükik).

### **Diläd telid: votükams votik**

Ünü period ot (de yel: 1887 jü yel: 1889) ceins votik äpubons in Volapük. Ats no päbespikons e no päzepons dü kobikams, ab päpübons in vödabuks calöfik e gramatabuks ot.

*Föivot ofovon*